

## МАЯ В 2-й ДЕНЬ

ИЖЕ ВО СВЯТЫХ ОТЦА НАШЕГО АФАНАСИЯ ВЕЛИКАГО, ПАТРИАРХА  
АЛЕКСАНДРИЙСКАГО

На Господи, воззвах: стихиры на 6, глас 4.

Подобен: Званный свыше:

**И**же безсмертная жизни сподоблен, \* егда Единосущнаго и Соприсносущнаго \* Отцу Безначальному Родителю \* Сына и Слова, Животодавца Христа проповедал еси, \* тогда огненным твоим языком попалил еси вещь ересей, славне, \* отгнав от церкви Христовы Ария, \* и Божественными словесы просветил еси \* благочестивых сердца мудре, \* поклонятися Троице во Едином Существе.

**Я**ко река Божия, наполнена вод духовных, \* явился еси, пречудне, \* наводнена Божественными учении, \* и напаяя церковное все исполнение, \* погружая же собор еретиков \* пучиною Божественных твоих словес, отче, \* и во глубине твоих разумений. \* Ты бо, премудре, Единосущнаго рождаемому Отцу \* Владыку Христа проповедал еси, \* Божественный Афанасие пребогате.

**Я**ко тайносказатель и Божественный святитель \* беды претерпел еси, и гонения терпеливно, \* и наветы, блаженне, и изгнания многовременна \* веры ради Христовы, \* ясно Единосущнаго, и Соприсносущнаго, \* и Равнодетеля, и Собезначальна Христа проповедаю \* Первоначальному и Собезначальному Отцу. \* Темже ты Сам украси пресветлыми яве научении \* и пресветла всей вселенней показа.

Ины стихиры, глас 5.

Подобен: Преподобне отче:

**П**реподобне отче, Богоявленне Афанасие, \* от младенства познался еси Церкви светильник, \* сияя видении пресветлыми \* и всяцем же образом богатея добродетелей, \* словесы огнедуховенными попаляя ереси, \* верныя же вся наставляя, \* Троицы сиянием пребожественным, \* в Божестве Едином разумеаемыя \* и соприсносущную славу имущия. \* Ту моли и Той молися всегда \* даровати вселенней единомышление, \* мир и велию милость.

**П**реподобне отче, Богоглаголиве Афанасие, \* тезоименит влепоту безсмертия наречен быв, \* сего ходатайствующею шествовал еси стезею, \* жития светлостию обогащя яве, \* ум чист, Богомудре, стяжав, \* Слову поборник обрелся еси и по Дусе дыхая Пресвятем, \* Имже просвещаемь, побеждал еси враги твоя, \* Имже ограждаемь, неутолим явился еси, \* Имже и обожаемь, \* Емуже и причастник, святе, \* всем испроси даровати единомышление, \* мир и велию милость.

**П**реподобне отче, Богопроповедниче Афанасие, \* беды претерпев и частыя напасти, \* пищи райския ныне сподобился еси, \* внутрь быв Божественных обителей, \* к древу приблизился еси жизни нетленной, \* яко победитель, праведным венцем украшен, блаженне, \* и диадимою Вышняго Царствия испещрен, \* и добротою сияя. \* Христови помолися, у Христа, Богомудре, проси \* даровати Церкви единомышление, \* мир и велию милость.

Слава, глас 6:

**Х**ристова святителя воспоем еси, Афанасия, \* яко Ариева учения вся упразднив, \* и Святыя Троицы державу во всем мире ясно возвещает, \* Единого Бога, в Трех Лицех Нераздельна, \* Егоже и молит о нас, \* верою совершающих память его.

**И ныне, праздника.**

**На стиховне Триоди.**

**Слава, святого. Глас 3. Германово:**

**П**аки нам златотечный Нил \* и безсмертия тезоименит, летною памятию пришед, \* добрыми восхожденьми наводняет \* златоструйная безсмертия лияния \* и пищу нетления плододая высоким благовещанием: \* Троицы нераздельней державе учит поклоняться \* и источает Божественная учения, \* верных напоет помышления \* и молится о душах наших.

**И ныне, праздника.**

**Тропарь, глас 3:**

**С**толп был еси православия, \* Божественными догматы подтверждая Церковь, \* священноначальниче Афанасие: \* Отцу бо Сына Единосушна проповедав, \* посрамил еси Ария. \* Отче преподобне, \* Христа Бога моли \* даровати нам велию милость.

## НА УТРЕНИ

Канон праздника со ирмосом на 6 и святого на 6, егоже краегранесие: Афанасий похвала православия бысть. Творение Феофаново, глас 8.

### Песнь 1

**Ирмос:** Колесницегонителя фараоня погрузи \* чудотворяй иногда \* Моисейский жезл, крестообразно поразив \* и разделив море, \* Израиля же беглеца, пешеходца спасе, \* песнь Богови воспевающа.

Афанасию приношаю похвалу, яко добродетель восхваляя, к Богу приношаю паче похваление, от Негоже человеком дается достохвально дарование добродетели, ейже бысть одушевлен образ и печать.

Богомудрия был еси исполнен и, паче солнца ангельским, блаженне, житием облистав ныне, преподобне, превозшел еси похвал законы, иже от нас, но приими, отче, аще и не по достоянию похваление.

Достодолжно убо песнь плетем, во славней твоей памяти, но лишаемся больших, Афанасие, по достоянию песней твоих, просим прощение нам дати и независтную благодать тобою Духа.

Юношески плотских страстей играние умертвил еси, в юности твоей стяжав мудрость старческую и благоуставно, Афанасие блаженне, желанием бо премудрости вся чувства исправил еси.

**Богородичен:** Воплощшагося нас ради, Всенепорочная, Иже прежде Безплотнаго, Богоначальнаго Слова Отча родила еси, о девственная похвало, и приятелище чистоты, и храм очищения, Владычице мира, Богоневесто.

### Песнь 3

**Ирмос:** Утверждаей в начале Небеса разумом \* и землю на водах основавый, \* на камени мя, Христе, заповедей Твоих утверди, \* яко несть свят, паче Тебе, \* едине Человеколюбче.

Очистив от всякия скверны душу же и тело, Афанасие, храм явился еси, достоин Богу, темже Троицы исполнение почи в тебе, священнотаинниче пребогате.

Твою душу, якоже желаше, Утешителява благодать от страстей очищену обретши, яве в ней действенная показывает и пресветло светило, отче, миру ты полагает.

Святительства убо правило святителем показался еси, детельнаго же подписание жития; слово же твое ясно, видения образ, премудре, Богословия же твоего предел учение явися.

**Богородичен:** Херувим и Серафим превышши явилася еси, Богородице: Ты бо едина прияла еси Невместимаго Бога во Твоем чреве, Нескверная. Темже, вернии, Ты вси песньми, Чистая, ублажаем.

По 3-й песни кондак и икос праздника. Таже седален святого, глас 8.

**Подобен:** Премудрости:

Премудрости слова навик, \* Ариеву лесь низложив, мирови проповедал еси православную веру: \* Отца бо Слово, Христа, жизнь нашу, \* воистинну быти уяснил еси сопрестольна. \* Темже единомудренно Церковь славит Троицу Единосущную, \* во Единице Божества, Богоносе Афанасие. \* Моли Христа Бога согрешений оставление даровати \* чтущим любовию святую память твою.

Слава, и ныне, праздника.

#### Песнь 4

**Ирмос:** Ты моя крепость, Господи, \* Ты моя и сила, \* Ты мой Бог, Ты мое радование, \* не оставь недра Отца \* и нашу нищету посетив. \* Тем с пророком Аввакумом зову Ти: \* силе Твоей слава, Человеколюбче.

Все тебе вдохну живоносное дыхание свыше, первое пришедшее боголепно, Дух Христов в горнице, и ученики насыщшее, апостола ты показа тринадцатого, отче, православную веру проповедающего.

Ты, Божественною ревностию зело распаляемь, собору споспешествовал еси и прежде, еже совершити ты председателя, в Никеи проповедал еси Единосущное. Темже Церкви Христос пастыреначальника и учителя ты поставляет.

Вручена имея церковная кормила от промысления Божественнаго, Афанасие, еретиков душевредная вся языкоболия, якоже некая секира, посекал еси, искореняя, якоже терние, и семя словесное напаяя, мудре возделал еси.

От твоего языка огненнаго сожжеся Ариево сродное разделение и слияние Савеллиево, яке от безмерия зла, и к нечестию единочестна, и вся с ними хуления еретическая, о Афанасие!

**Богородичен:** Нов Адам за перваго Ты был еси от Девы, за праматерь – Избавитель всех и Спас, за смерть – истинная Жизнь безсмертная. Темже Тя рождающую Богородицу ведуще, по достоянию, Чистая, ублажаем.

#### Песнь 5

**Ирмос:** Вскую мя отринул еси \* от лица Твоего, Свете незаходимый, \* и покрыла мя есть чуждая тьма, окаяннаго? \* Но обрати мя и к свету заповедей Твоих \* пути моя направи, молюся.

Христа имея, глаголюща, отче, во органе доброгласнем языка твоего, посрамил еси убо идолов написанно ересь, заблужденныя наставляя и обращая ко истинному Богу, Афанасие.

Губительныя ереси вся, отче, изобличил еси словесы и писаньми, различную лесть изгоняя мудрыми показаньми из вселенныя, уясняя невоспротивословне православную веру, блаженне.

Тя учителя воистинну велика учителей мудрых, Афанасие, неложно сказует и со апостолы причте Церковь Христова, отче, изъясляюща слово веры непорочное.

**Богородичен:** Матернее дерзновение к Сыну Твоему стяжавши, Всечистая, сроднаго промысления, еже о нас не презри, молимся: яко Тя и едину христиане ко Владыце очищение милостивно предлагаем.

#### Песнь 6

**Ирмос:** Очисти мя, Спасе, \* многа бо беззакония моя, \* и из глубины зол возведи, молюся, \* к Тебе бо возопих, и услыши мя, \* Боже спасения моего.

Чуждаго семене сеятель явився Аполлинарий, земнаго словесе и ума Христова вочеловечение, крепко изобличися от Тебе, преблаженне, якоже несмыслен и умовреден.

Глагол твоих, блаженне, Богодухновенных сила, яко глас грома, во уши, Богоприятне, яве возгреме еретичествующих и лица их очерни.

Дивится всяк твоим, отче, влепоту списаниям мудрым, любезно вмещающая, хотящая быти прозябения ересей провидя, отвращаемая от Тебе пророчески.

**Богородичен:** Сын Единородный и прежде век невидимый, в последние дни Первенец бысть, зрим в телеси из Тебе, Богомати, Бог спасения моего.

**Кондак, глас 2.**

**Подобен:** Кровей Твоих:

Православия насадив учения, \* злославия терния изсекл еси, \* умножив семя веры одождением Духа, преподобне, \* темже ты поем, Афанасие.

**Икос:** Быстрины словес твоих источив Божественного учения мирови, души верных напоил еси, Афанасие, и еретическия предстатели потопил еси, яко другия египтяны, закон нам богоначертанный дав православия, покланяние Троицы во Едином Божестве чтити, Еюже нас соблюди, от враг невидимых избавляя, темже ты поем, Афанасие.

**Песнь 7**

**Ирмос:** Божия низхождения \* огонь устыдися в Вавилоне иногда, \* сего ради отроцы в печи, радованною ногою, \* яко во цветнице, ликующе, пояху: \* благословен еси, Боже отец наших.

Единочестное, Сопрестольное Отцу Слово, Единородна же Сына православно проповедава, безсмертия, отче тезоимените, абие научаеши, Духу Сопрестольна, и Единосуцна, и Соприсносущна.

Учителя ты и проповедника священноявленна Трисолнечнаго Света, возвещающа веру православия даже до конец земли, нечестия зря родитель, изгнания на ты воздвизает.

Беды безмерныя яже подъял еси, блаженне, подвизаяся по благочестию, венцы же, такожде светлии, ибо адамант был еси биющим, к себе же, яко магнит, привлекал еси вся.

Странныя догматы, чуждия же Церкви Христовы, изгнал еси, Троицу богословив Ипостасьми, Божеством же Единицу, Юже пел еси: благословен Бог отец наших.

**Богородичен:** В лето Безлетнаго, Неискусобрачна едина бывши, Яже первее Безплотное Слово, плоти приятием, Дево, родила еси, Емуже поем, согласно зовуще: благословен Бог отец наших.

**Песнь 8**

**Ирмос:** Седмерицею печь \* халдейский мучитель \* Богочестивым неистовно разжже, \* силою же лучшею спасены, сия виде, \* Творцу и Избавителю вопияше: \* отроцы, благословите, \* священницы, воспойте, \* людие, превозносите во вся веки.

Святителей украшение благославное, Афанасие, столпе света и Церкви утверждение, Троицы поборниче, Богословия трубо златая, жития же монашескаго известный законописателю, с нами празднуеши, иереи совершая, люди верныя приводя Христу во веки.

Безсмертия был еси воистинну тезоименит, детельныя бо словом превозшел еси, искусных же в слове известием жития побеждая, во обоих прешел еси край. Темже, непреложною добродетелию просияв, безсмертную стяжал еси память во веки.

**Т**ы светлейшее показал еси, тайнонебесниче Богоприятне, святительство доблыми страданьми твоими, прелесть изгнал еси твоими изгнаними частыми по Троице, Юже проповедуя, вопиеш: Отцу поклонитесь, Сына богословите, Духа воспойте во вся веки.

**Богородичен:** Света незаходимаго была еси приятелище, Пречистая, Свет бо сущим во тьме и сени бысть, просвещая всяческая Богоразумия благодатию, Егоже непрестанно, вернии, во вся веки поем.

### Песнь 9

**Ирмос:** Ужасеся о сем небо, \* и земли удивися концы, \* яко Бог явися человеком плотски \* и чрево Твое бысть пространнейшее небес. \* Тем Тя, Богородицу, \* Ангелов и человек чиновачалия величают.

**П**росия житием, яко молния, излися же, отче, всем вещание твое, якоже гром, ихже солнце назирает, с Небесе бо имел еси свыше вдохновение истинно. Темже не угаси твоя памяти ходатай забвения гроб, Афанасие.

**С**ветом трисолнечным и трисиянным яснейше ныне осияемъ, певцем твоим осияние заревидное являеши, яко зеркалом, свыше испущая солнечне, и ты состави, блаженне, аще велико и мало паче достоинства просимое.

**П**оюще, молим тя прилежно: о Церкви помолися, крестом победы даровати воинству, православней же вере крепость на ереси врагов, нам же спасение, мир же миру в твоей памяти, Афанасие.

**Богородичен:** Всех Предстательнице христиан, Богомати Дево Пренепорочная, яко Милостива, избави от бед и напастей оскорбленныя рабы Твоя, и недугующия лютых струп язвами, и болезнями ран болящия изврачуй.

### Светилен.

**Подобен:** Свете неизменный:

**Р**ека златоточная явился еси, \* учений водами напаяя, \* служитель Троицы, святителей украшение, \* ты бо Ариево учение, Афанасие, разорил еси учением твоими.

### Слава, ин.

**Подобен:** Небо звездами:

**А**рхиереев славу и Египта воспитание, безсмертия украшение, \* воспойм во хвалении Афанасия великаго, \* яко низложителя Ариева и верных заступника.

### И ныне, праздника.

**На хвалитех стихиры на 4, глас 4.**

**Подобен:** Яко добля:

**О**гненными твоими учением \* ересей всяка хвратная вещь поपालется, преславне, \* глубиною разумений потопляется \* воинство непокоривых злочестивое, \* Афанасие преподобне, \* твоими же учением удобряется, блаженне, \* на кийждо день верных Церковь, \* велегласно почитающаи тя.

**О**т Христовы Церкви мысленныя волки отгнал еси, премудре, \* жезлом учений твоих \* и сию окрест оградил еси словес утвержденьми \* и представил еси Христу

недвижиму и непоколебиму. \* Егоже моли от тли и бед избавитися \* верою совершающим всечестную память твою.

**С**ловес твоих Божественных светлостью, преподобне, \* Церковь вся украшается, \* и благочестно удобряется красными добротами, \* и почитает достожджно всепразднственную память твою, Афанасие, \* священников славо, \* благочестия светлый и великий проповедниче, \* Троицы поборниче.

**Слава, глас тойже. Германа Патриарха:**

**В**еликая церковная истинная труба, \* многотрадальный Афанасий \* к благохвалению днесь созывает вселенную светло. \* Вернии вси, к торжеству предусрящим добраго пастыря, \* песнями почитающе священныя его труды, \* яко да молитвами его \* приемем от Христа Бога велию милость.

**И ныне, праздника.**

**На стиховне праздника. Слава, глас 3:**

**В**еликое украшение святителей, \* Афанасия, непобедимаго предстателя, священнолепно да восхвалим: \* сей бо, ересей ссек полки силою Пресвятаго Духа, \* православию победная воздвиже по всей вселенней, \* сочетая благочестно Тройческое таинство свойством Лиц, \* и паки совокупляя несмесно во Едино Существа тождеством, \* и херувимски богословя, \* молит присно о душах наших.

**И ныне, праздника.**

## НА ЛИТУРГИИ

Блаженны праздника, песнь рядовая и святого песнь 3-я.

**О**чистив от всякия скверны душу же и тело, Афанасие, храм явился еси, достоин Богу, темже Троицы исполнение почи в тебе, священнотаинниче пребогате.

**Т**вою душу, якоже желаше, Утешителява благодать от страстей очищену обретши, яве в ней действенная показывает и пресветло светило, отче, миру ты полагает.

**Слава:** Святительства убо правило святителем показался еси, детельнаго же подписание жития; слово же твое ясно, видения образ, премудре, Богословия же твоего предел учение явися.

**И ныне: Богородичен:** Херувим и Серафим превышши явилася еси, Богородице: Ты бо едина прияла еси Невместимаго Бога во Твоем чреве, Нескверная. Темже, вернии, Ты вси песньми, Чистая, ублажаем.

**Тропарь святого, глас 3:**

**С**толп был еси православия, \* Божественными догматы подтверждая Церковь, \* священноначальниче Афанасие: \* Отцу бо Сына Единосушна проповедав, \* посрамил еси Ария. \* Отче преподобне, \* Христа Бога моли \* даровати нам велию милость.

**Кондак святого, глас 2.**

**П**равославия насадив учения, \* злославия терния изсекл еси, \* умножив семя веры одождением Духа, преподобне, \* темже ты поем, Афанасие.

**Прокимен, глас 7: Честна пред Господем \* смерть преподобных Его.**

**Стих: Что воздам Господеву о всех, яже воздаде ми?**

**Апостол ко Евреем, зачало 318.**

**Б**ратие, таков нам подобаше Архиерей, преподобен, незлобив, безсквернен, отлучен от грешник и вышше Небес быв. Иже не имать по вся дни нужды, якоже первосвященницы, прежде о своих гресех жертвы приносить, потом же о людских: сие бо сотвори единою, Себе принес. Закон бо человек поставляет первосвященники, имущия немощь, слово же клятвенное, еже по законе, Сына во веки совершенна. Глава же о глаголемых: такова имамы Первосвященника, иже седе одесную Престола Величества на Небесех, святым служитель и скинии истинней, юже водрузи Господь, а не человек.

**Аллилуя, глас 2: Священницы Твои облекутся в правду, \* и преподобнии Твои возрадуются.**

**Евангелие от Матфея, зачало 11.**

**Р**ече Господь Своим учеником: вы есте свет мира, не может град укрытися верху горы стоя. Ниже вжигают светилника и поставляют его под спудом, но на свещнице, и светит всем, иже в храмине суть. Тако да просветится свет ваш пред человеки, яко да видят ваша добрая дела и прославят Отца вашего, Иже на небесех. Да не мните, яко приидох разорити закон, или пророки: не приидох разорити, но исполнити. Аминь бо глаголю вам: дондеже преидет небо и земля, иота едина, или едина черта не преидет от закона, дондеже вся будут. Иже аще разорит едину заповедий сих



малых и научит тако человеки, мний наречется в Царствии Небеснем, а иже сотворит и научит, сей велий наречется в Царствии Небеснем.

**Причастен:** В память вечную будет праведник:

#### Молитва

**О** всехвальный и преславный святителю Афанасие Великий, за веру Православную ты был еси в долзех трудех, мнозех подвизех, в пятикратных изгнаниих и бегствех, претерпел еси многи клеветы и оболгания, многажды за ню хотеша врази твои убити тя, и токмо Сам Бог чудесно сохрани тя от смерти. И все сие ты претерпел еси от нечестивых еретиков – ариан, с ними же и боролся еси, и ихже, в пучине словес погрузив, терпением твоим препобедил еси, и, зловерие их от Церкви отгнав и православное учение насадив, умножил еси семя веры Христовой. Воистинну ты еси храбрый воин Христов, яко воин бо, до конца дний твоих славно боролся еси за правую веру со еретики. Воистинну ты еси столп веры Православная, ибо никакоже поколебася вера твоя Православная от сих гонений еретических, но паче утвердися и укрепися, и не токмо у тя и у паствы твоея, но и во всей Церкви Христовей. К тебе молимся, угодниче Божий, испроси у Христа Бога нашего и нам имети веру непоколебиму и не уклонитися от праваго пути ея, но до конца дний своих пребыти на нем, не боящися ни лести, ни прещения, ни даже гонения, и унаследовати Царство Небесное во славе Бога Отца и Сына и Святаго Духа, идеже ты и вси святии пребывают. Аминь.